

印象上深的一个人

各位評判老師、小朋友逐家好，我是第 號，今仔日我欲來講「印象上深的一个人」。

若講著印象上深的一个人，彼伊就像暗暝天頂劃過的一粒流星咧。

頂學期尾欲歇熱遐，我共問講「老師，你五年的會閣教阮無？」伊攏笑笑，無予阮答案，極加是講「看學校按怎安排。」今就開學遐久矣，佇無蓋大的校園內底，我猶未拄著伊，真想欲閣看伊一面，想講這學期看會當閣予伊教著無。毋過，無呢！親像犀牛望月的貓貓看，這牆看過彼壁，猶是看無老師你的影跡，開學一禮拜過，實在是擋袂牢，就去問阮班級導師，才講伊這學期無來阮學校教冊矣！

啊～親像晴天霹靂咧，哪會按呢？佇阮頭殼底，伊真正是一位好老師，是我遮大漢以來印象上深的一个人，伊就是阮的閩南語課的台語老師。

上伊的課毋但趣味閣好耍，除了課本以外，伊閣會補充一寡咱台灣傳統的囡仔歌，像：天烏烏欲落雨、西北雨直直落、火車行到伊都阿脈伊都丟的丟丟銅仔。。。遮的傳統的囡仔歌，阮規班攏真愛唱，轉去厝閣會唱予序大人聽，個毋但會共阮拍嘆仔呵啫講讚，猶閣會綴阮唱咧，這是較早毋捌有的經驗，會當佻序大人做伙唱個以早的囡仔歌，感覺足好的，抑無個定定攏講毋知我是咧唱啥。

上伊的課閣會予阮有表現的機會，毋是愛阮乖乘坐咧，像鴨仔聽雷恬恬聽全款。像講教以早阮認為上無聊的拼音字的時，伊總會引恁阮來臆，予阮烏白拼，烏白鬥，講著的人會使加分；閣像咧教一个拼音的字，就予阮來造詞，會曉全款加分，啊彼就輸人毋輸陣囉，我攏會和同學拚，這就是伊和別的老師上課無全款所在，所致伊是我印象上深的一个人。

今仔日我就講到遮，向望我這位老師會當聽著我的演說。多謝！